





門 5  
號 3150  
卷 10

黔南識略卷十四

鎮遠縣

貴州巡撫長白愛必達撰

鎮遠縣附郭漢無陽縣地唐綦山縣地宋政和八年置邛水縣屬思州宣和四年廢爲堡屬黔州紹興三年復置縣屬思州元置鎮安縣尋改安夷縣後又爲金容金達等處蠻夷軍民長官司地屬思州安撫司明洪武二年改爲鎮遠金容金達蠻夷長官司授土酋何氏世守屬思南宣慰司永樂十二年屬鎮遠州正統三年改屬府宏治十一年長官何倫以罪廢因



黑龍江田名一四  
改爲鎮遠縣西南有鎮遠衛洪武二十三年置屬  
湖廣都司萬歷二十九年改屬貴州三十一年還屬  
湖廣

國朝康熙二十二年以湖廣鎮遠衛屬府省衛入縣設  
知縣一縣丞一駐府地邛水主簿一駐四十八溪教  
諭一訓導一典史一其境東至青谿縣平蠻塘三十  
里南至府屬拖金塘五十里西至施秉縣劉家庄三  
十里北至石阡府白崖塘一百四十里東南至府屬  
邛水白蟲塘五十里西南至施秉黃冲鋪三十里西  
北至思南府塘頭一百五十里東北至四十八溪龍

眉三百四十里地狹民聚梯航交馳黔中有驛州縣  
惟此爲最繁蓋自楚來者至此而陸自滇來者又至  
此而舟也其山川風俗已詳府記縣屬民田共七千  
一百七十九畝有奇兼管屯田共一萬二千八百八  
十九畝有奇民田額徵秋糧八十六石九斗有奇改  
徵米五百八十一石五斗有奇每石加耗一斗四升  
屯田額徵秋米豆四百二十九石六斗有奇內有四  
十八溪應徵屯米七十石卽就近運供銅仁協兵糧  
其餘民屯徵存之米歲支廩生米八十石鎮標兵米  
六百八十九石有奇歲運台拱兵米一百三十一石



二斗歲運銅仁縣兵米七十四石二斗有奇又運赴銅仁縣轉運松桃石峴兵米二百二十五石七斗有奇此歲徵秋米定額及支給撥運之成數也常平貯穀二萬一千一百五十五石三斗有奇義倉貯穀四千四百二十五石七斗每歲額徵地丁五百三十三兩四錢及于米內帶徵丁銀九兩九錢九分有奇均扣存縣庫支作驛費不敷之數赴司領給通屬二萬二千零二十戶十萬八千二百三十一名口文武學額各八名縣丞管轄府民主簿駐劄四十八溪距縣四百餘里管理四十八旗屯地衛城歸縣經管驛曰

澗陽上至施秉六十里下至清溪一百里額馬一百匹牌役二十五名鋪六鋪夫二十五名渡口一在焦溪餘與他屬同

施秉縣

施秉縣在省城東北三百八十五里府西南六十五里漢無陽縣地唐爲胡刀瑯川兩縣地宋爲豎眼大田溪洞蠻地元置施秉前江等處蠻夷長官司明洪武五年改爲施秉蠻夷長官司屬思南宣慰司永樂十二年屬鎮遠州正統九年改爲縣天啟元年省崇禎四年復置卽舊縣縣丞分駐地今治舊爲偏橋衛



洪武二十三年改偏橋司德勝寨爲偏橋衛屬湖廣都司萬歷二十八年改屬貴州三十一年仍屬湖廣國朝因之康熙二十二年改屬貴州二十六年省衛入縣移縣治于衛城屬鎮遠府設知縣一縣丞一教諭一訓導一典史一其境東至地壩右土司界二十里西至餘慶縣界八十里又至龍泉縣界三百四十里南至黃平州界三十五里北至鎮遠縣界三十七里東南至楊柳塘與右土司屬交界三十里東北至舊縣城外河與台拱交界九十里西南至唐家屯與湄潭縣交界三百五十里又至雙鷺屯與綏陽縣交界

三百七十里西北至谷定塘與石阡府交界四十里又至大沖口與思州思南二府交界一百六十里黔省藩屏郡西襟帶苗夷有警縣當其衝明偏橋會襲偏橋掠興隆鎮遠楚黔路梗事平後益爲重地城爲明洪武年間所築地勢西南高而東北下歷久傾圮乾隆五年修周一千一百四十七丈門五西門郭外增築小城便登望防窺伺也舊城約三里餘新城約二里餘皆登以石飛鳳山在城西隅岑嵒山在舊城北一里爾雅小山多石曰嵒土人呼高爲岑也元末有陳元帥者屯兵于此營壘尙存岑麓山在城東南



岡巒重複四面陡立縣初治從化鎮正統十四年燬于苗後招撫復業依此爲治雲台山在城西北三十里獨立萬山中無岡嶺聯屬雲停烟結仄徑縈迴及巔平坦可數百畝旁有石如列屏巴施山在城北十五里大相見坡小相見坡在城東田雯黔書曰三重迭起高皆千仞陟首坡則尾坡見至尾坡迴矚之則首坡見立中坡前後望則首尾畢見起伏偃仰石垂烟接方沈澗心突凌峰頂行者此以手招彼以口呼送響答于咫尺而不知三十里之遙也打杵崖在城東北一里壁立河干爲水所迫常有棧閣以通行者

故曰偏橋屢經修鑿今成垣途矣漏日崖在城北二里高峰壁立有竅通明諸葛洞一名甕蓬洞在城東北十里踞鎮陽江之上流東縣大小江諸水出于其間地勢極險傳武侯征蠻經歷處也土人有謠曰若令三洞開除非諸葛來明萬歷中巡撫郭子章經此開第一洞自河築堤至老虎江出沈家溶又由砥柱石黃石板至夾船口百十有六丈次開第二洞自團倉石歷半運洞前至小屏山下六十有六丈次開第三洞自二洞塘至河石崖山三十有五丈始可行舟久復淤塞順治十六年巡撫下三元因黔饑楚米



黑南諸田卷十四 五  
艱于輓運伐險鑿石漕楚米萬石徑達黃平城下雍正四年知縣沈遴復行疏鑿今旅客經此上下距懸五六丈石高于屋船輕若葉寔暑風盪魂魄猶悸相傳洞中有怪物狀如水兕云前江在城南上爲重安江下卽清水江小江在城南源出北門河至城東合大江大江卽無水在城北源出黃平之都回山過舊州爲西門河入縣境受瓦窰杉木等水至城東合小江謂之兩江口下諸葛洞至鎮遠爲鎮陽江杉木河在城北流合大江凱溪在城東合大江秉溪別溪鳳溪鶴溪均在城南湧珠泉在城西隅泉出如貫珠響

泉在城南泉聲觸石如雷冬春常溢灌溉甚廣現在田九千三百八十八畝有奇額徵秋米並地丁改徵米石共一千二百九十三石有奇內撥鎮遠府就近徵收米一百四十石四斗又歸縣丞徵收米二百五十九石六斗縣倉實徵收米八百九十一石六斗有奇常平倉貯穀二萬六千五百二十一石二斗有奇義倉五本城一貯穀一千三十石另有捐田歲收穀五十石濫橋一貯穀三百六十石新城一貯穀三百七十石劉家庄一貯穀四百一十石另有捐田歲可添穀二十餘石馬溪場一貯穀三百六十石另有捐



田歲收穀十餘石皆縣學訓導與士民經管每歲接  
收餘慶縣輓運兵米一百二十四石二斗有奇轉運  
鎮遠府接收仍自運府倉兵米一百六十六石八斗  
又輓運台拱兵米三百石餘則支本汛兵糧及廩餼  
學額文武各十二名設有鳳山書院義學一縣丞分  
駐勝秉有土城計五百丈縣城駐劄千總一員外委  
一員兵一百三十名新城汛把總一員兵四十名  
勝秉汛守備一員把總外委各一員兵一百一十  
名通屬江內四十八屯江外四十八屯設堡四駐屯  
軍二百六十七戶黃施衛千總領之驛曰偏橋上至

黃平六十里下至鎮遠六十里額馬五十四站夫一  
百名大道塘六僻路塘八有捷徑三一由新寨至勝  
秉達清江台拱一由谷定大平赴思南一由金蓬出  
鎮遠場市以寅申日趁集地產梨柑橘茶薏苡之屬  
木饒桐茶松柏椿梓杉柳黃楊之屬苗有黑苗花苗  
侗兜三種皆與他屬同



黔南識略卷十五

貴州巡撫長白愛必達撰

天柱縣

天柱縣在省城東南六百五十里府城東南二百一  
十里宋屬誠州明洪武三年置天柱衛二十五年又  
置天柱守禦千戶所隸湖廣都司萬歷二十五年改  
置縣又割綏甯會同兩縣地益之隸湖廣靖州

國朝雍正五年改隸貴州黎平府十一年改屬鎮遠府  
設知縣一教諭一訓導一典史一乾隆元年設縣丞  
一員分駐柳霽係清江廳地方距縣一百四十里巡



檢一員駐沅口在縣東六十里其境東至湖南會同縣牛場坳八十里南至黎平府皮所寨八十五里西至清江廳八卦河七十八里北至湖南沅州府分水坳一百里又與思州府屬甘昧寨連界東南至湖南靖州銅羅段七十里西南至清江浦洞司八十里西北至鎮遠府款場五十里東北至湖南黔陽縣捐洞一百二十里廣一百四十里袤一百一十里縣治舊建土城今圯方輿紀要載明洪武間古州蠻作亂楊文討之由沅州伐山開道抵天柱遂涉苗境營縣西之小坪而以偏師別由渠陽零溪西山徑銜枚夜發

犄角以進分道夾攻直抵洪州泊里福祿永從諸洞大破之貴州帥顧成亦勦平臻剖六洞各處天順間湖帥方瑛自天柱進討苗賊克天堂墨溪等二百二十七寨又縣西有谷種寨湖督白圭議以谷種爲山箐諸蠻雜處係東苗羽翼乃分軍進討一由青崖一由牛皮箐一由鬼山一由谷種所向皆捷卽其地也柱石山一峰直峙宛如柱石縣之得名以此煙墩山爲縣城發脈之所黃曉山在城南七十里與茅坪接壤峻險難行上下二十里對面有五龍嶺千佛鍾鼓洞在城西二里中容數百人清流自洞中出鑑水江在



縣北又名北門江發源新溪繞城而下與清江合又  
西江在縣西北下入鑑水江分水凹在縣北七十里  
沅州界水自凹分一歸沅州一歸鑑江清水江在縣  
南六十里發源都勻歷係生苗盤踞雍正八年貴東  
道方顯招撫開通舟楫可行自清江廳東北至天柱  
之甕東始入湖南黔陽縣界鎮遠江自東北來會之  
蓋自源至此已千一百餘里矣田畝現在中則田七  
百五十二頃一十七畝有奇額徵秋米一千三百二  
十二石七斗有奇改徵米一千四百九十六石三斗  
有奇丁銀一千二百八十九兩七錢有奇每年挽運

清江兵米一千一十九石九斗有奇印水兵米四百  
九十四石額貯常平倉穀三萬一千六百九十八石  
七斗有奇社穀三千七十九石九斗有奇本城義倉  
貯穀二千一百七十二石一斗遠口義倉貯穀一千  
一百四十六石八斗漢苗村寨計三百三十八共二  
萬五千二百九十五戶男婦大小名口共十四萬六  
千二百有奇學額文武各十二名建有鳳城書院城  
中駐劄都司一員把總一員外委二員兵一百一十  
名分防道口汛外委一員兵三十八名全處汛千  
總一員兵四十六名漢寨汛外委一員兵三十八名



革溪汎把總一員兵四十六名四汎共十六塘十鋪  
共鋪夫二十一名鷓鴣小江江東三渡通楚省靖州  
會同各設渡船四至皆大路惟自革溪至思州其徑  
頗捷場市十一地產菜茶桐白蠟棉花樹多杉桐不  
宜桑舊產金有花羊黃花二廠旋開旋閉苗有花苗  
黑苗二種餘與各縣同

### 黃平州

黃平州在省城東南三百一十里府治西一百二十  
里漢故且蘭縣地宋爲狼洞地元爲黃平府屬播州  
安撫司明洪武八年改爲黃平安撫司屬播州宣慰

司十五年改屬貴州都司二十二年分置興隆衛亦  
屬貴州都司萬歷間改安撫司爲黃平州屬平越府  
國朝因之嘉慶三年改平越府爲直隸州以黃平改屬  
鎮遠府設知州一學正一其訓導一巡檢一駐舊州  
吏目一其境東至施秉縣界二十五里西至甕安縣  
界六十里南至清平縣界四十里北至餘慶縣界四  
十里東南至台拱同知界一百四十里西南至清平  
縣界七十里東北至本府界五十里西北至平越直  
隸州界六十里廣九十里袤一百一十里襟沅帶瀘  
黔楚藩維城爲興隆衛治明傅友德建周五百三十



丈高一丈五尺廣八尺門四甃以石

國朝康熙二十六年裁衛并州移州治于衛城轄重安巖門朗城三土司地興隆黃平天官太平四里其太平一里孤懸于甕安餘慶湄潭三縣之間距州一百四五十里至一百七八十里不等梅花山在城東龍巖山在城北其下爲龍洞又名狼洞山勢崢嶸水色深碧傳有龍潛其中時出雲雨明初衛名興隆以此後改爲隆相接又有揭榜山北辰山其尤勝者爲飛雲巖在城東二十里官道旁山壁立千仞中虛而下嵌勢如垂天之雲中有小洞深不可測左有瀑布琤

琮作鳴玉聲前一小峰上構聖果亭王守仁碑記石刻在焉下有月潭寺古杉萬本垂蔭蔽虧爲黔中第一奇境黔書云巖性好潔昔有信宿于此而身垢者旣去則瀑水突至瀾漫山椒而澣之再垢則復澣鼓台山在城南五里頂平如鼓四圍塹削鑿梯挽鐵絙乃可上相近者有銅釘山又有宜娘山山頂可容萬人相傳宋時有宜娘屯兵于此故名香爐山在城西南十五里與清平縣接截洞在城南重安江中洞有巨石橫截江流小舟通平越豬場地明景泰二年苗賊韋同烈糾眾數萬屯聚截洞攻平越清平官軍進



黑南諸山卷十五 五  
討賊遂退據香爐山是也石林山在城北八十里馬鬃嶺在城東四十里大路所經接鎮遠石阡二府界嶺陽有馬蹄井梯子山在城南五里山最高中有一徑屈典陡峻梯石磴而上都凹山在城西北二十里鎮陽江之源出焉古之無水也七里谷在城東五里俗名七里衝兩山壁立中通一路明時楊應龍叛屯兵二十七營于此以窺黃平蓋以此爲會垣咽喉也梅子洞在城東三里多梅樹燕子洞在城西十五里紫燕千百潛藏于此葛浪洞在城北二十里一山橫亘中多洞穴昔人于此避兵重安江在城東三十里

發源麻哈州三江會流由清平縣孛羅入州境經重安城外下達清江洪亮吉水道考以重安江卽清江之別名不知重安江特入清江之支流也雍正十三年苗賊陷重安驛尋陷黃平州城及舊州城連陷清平餘慶施秉等縣後逆苗聞滇兵至俱蟻聚重安江以塞要衝提督哈元生率兵開通大路新舊兩城以次克復又合兵攻重安江賊潰遂復重安驛兩岔河在城西南十五里水有二源一出上塘一出大原合而爲一流入平越州界卽麻哈江之上源也又城西有筭水流入兩岔江冷水江在城東三里水白而寒



三伏不可涉流入岔江明史石邦憲傳招降冷水溪諸苗二十八砦卽此高溪在城西北旁有高溪屯下流合秀水入重安江秀水溪在城東三里東坡堡下西門河在城東三十里舊州城西卽鎮陽之上流前因有諸葛洞礙難行舟開而復塞順治十六年疏灘鑿石以通楚運輓舟銜尾而上集于城下又城東南有苗裏水出苗裏寨下流入鎮陽江北攸河在城北三十里原名都凹山水卽鎮陽之源北門河在城北處洞河在城西十里源出苗境東流台北門河入鎮陽江翁播潭在城西十里其深不可測土人于此禱

兩王井在城南明時洪武間岷王封于滇經此鑿井故名田畝現在成熟田四萬五千六百九十八畝七分有奇徵米三千九百七十六石一斗有奇徵銀二千六百三十八兩有奇歲撥運鎮遠府兵米二千六百一十三石有奇餘米供支黃平營兵糧及廩生寒生孤貧等米常平倉實貯穀三萬零九百二十一石八斗有奇義倉四州城一舊州一重安一浪洞一共實貯穀一千七百九十五石七斗有奇戶口倍增于昔漢民共四萬五千七百四十六戶男婦大小共一十八萬四千二百零九名口流寓客民共一千二百



五十三戶男婦大小共四千五百四十名口苗民戶口向不編造學額文武各十五名城鄉義學四城有龍淵書院舊州有星山書院城中駐劄都司一員千總一員經制外委一員舊州巖門二汛把總各一員翁蕩重安二汛經制外委各一員存城分汛兵共三百一十名轄三土司重安巖門二司皆土吏目朗城司係土千總驛曰興隆上至清平六十里下至施秉六十里額馬五十匹站夫一百名重安係腰站場市城鄉俱有以十二支分配趕集苗有黑苗西苗天苗犴猪木狯狃家狺獠七種天苗緝木葉爲衣著短

裙女子年十五六卽別構竹樓處外人死以藤蔓束之樹間餘苗與他處同重安渡口與清平縣各設渡舡一大路南入清平北達施秉東南僻徑直通台拱地產土布藍靛棉花樹多楓楠茶蠟俗好訟多江右容民故也





黑存譜冊卷十五

八



